



**Uunga siunnersuut: Pinngitsuuisinnaajunnaarnermik katsorsaaneq pillugu Inatsisartut inatsisissaat nr. xx, xx.xxx 2018-imeersoq**

(Peqqissutsimut Ilisimatusanermullu Naalakkersuisoq)

(Siullermeerneqarnera)

Atornerluineq pinngitsuuisinnaajunnaarnerlu ajornartorsiutaapput imaannaangitsut. Ilaqutariinnik avissaartutsitsisarput aamma inuunermik aserortisarput. Alianaqaaq aamma immikkoortoq politikikkut eqqumaffiguarparput. Isumaliutiguarparput innuttaasunut pinngitsuuisinnaajunnaarsimasunut neqeroortigut ajunnginersut.

Tamanna tunngavigalugu isumaqarluarpoq pinngitsuuisinnaajunnaarnermik katsorsaaneq pillugu inatsisiliunneqassapat.

Demokraatini inatsisissatut siunnersuut atuarluarparput aamma isumaqarpugut tunngavissaalluortoq sukumiisumik pimoorullugulu suliat suliarineqarsimmata tamannalu aamma tusarniaanermut atatillugu akissutini tapersuineq takutinneqarsimavoq.

Taamatullu oqareerluta inatsissaq ilaqarpoq ataatsimiitaliami suliarineqalerpat suliarerusutatsinnik.

Siullermik isumaqarpugut pisariaqanngitsoq Allorfiup innuttaasumut atornerluisumut pitsaanerpaamik neqeroorteqarsinnaanissaa. Allanik katsorsaasoqarsinnaavoq suliamut tassungarpiaq piginnaeqarnerusunik. Qanorli iliorluta qularnaartassavarput atornerluisunut ataasiakkaanut katsorsarneqarnissamut pitsaanerpaamik neqeroorteqartoqartarnissaa?

Tassunga atatillugu Demokraatini isumaqarpugut pingaartoq katsorsaasut assigiinngitsut akornanni kiffaanngissuseqarluni assigiinnginnillu atugaqarluni unammilleqatigiittoqassasoq, uangut isumarput naapertorlugu aki tunngavigalugu katsorsaaneq pitsaanerpaaq taamaaliornikkut qularnaarneqarsinnaasoq.

Taamatutaaq aamma pingaarpoq najukkami katsorsaaviup kiffaanngissuseqarluni assigiimmik unammilleqatigiittoqarnerani peqataanissaa. § 11 imm. 4 naqissuserneqarpoq Allorfik katsorsaasunik namminersortunik suleqateqarsinnaasoq. Demokraatini kissaatigaarput ersarinnerusumik allassimassasoq Allorfik katsorsaasunik namminersortunik suleqateqassasoq.

Aappaatut Demokraatinut pingaaruteqarpoq Allorfiup katsorsaasulluunniit allat katsorsaariaatsimut aalajangersimasumut qilersorsimassanngimmata. Atornerluisut tamarluinnarmik assigiinngitsuupput



aamma taamaattumik katsorsaariaaseq aalajangersimasoq katsorsagassanut taamaallaat atorpeqarsinnaanngilaq. Inuit ataasiakkaat aallaaviusariaqarput tamatumalu kingorna katsorsaanissaq pitsaanerpaaq aamma tulluunnerpaaq aalajangersarlugu.

Pingajussaatut nuannaarutigaarput inatsisissamat siunnersuutikkut ammaanpeqassamat katsorsartissimasunik nalunaarsuisanissaq. Uangutsinnulli pingaaruteqarpoq paasissutissaasiviup atorluarneqarnissaa. Isumaqarpugut Inatsisartut kommunillu ingerlaavartumik ilisimatinneqartassasut qassit katsorsartissimansut aamma qassit katsorsartereernerum kingorna atornerluileqqittarnersut aammalu katsorsartereernerup kingorna atornerluijunnaarnek attatiinnarneqartarnersoq. Tamatuma saniatigut paasissutissaasivik atorneqartassaaq katsorsaariaatsit sorliit pitsaanerunerannut nalunaarsuiffittut. Uangutsinnu pingaaruteqarpoq pitsanngorsaajuarnissaq angusat pitsaanerpaajutikkumallugit.

Naalackersuisut tunniussaanni atortussani ersarissumik takuneqarsinnaavoq atornerluineq toqqaannartumik aningaasartuuteqarfiusorujussuuvoq. Peqqissutsimut inunnillu isumaginninnermi toqqaannartumik aningaasartuutit katillugit, akissarsiatigut annaasat kiisalu pinerluttarnerup kingunipilui ukiumut naleqartarput 250 millioner koruunit 316 millioner koruunillu akornanni. Tassani aamma toqqaannartumik aningaasartuutit pineqarput. Toqqaannanngitsumik aningaasartuutit tassaasinnaasut peroriartornermi atornerluinerup kinguneranik ilinniagaqanngitsoorneq assigisaallu ilanngunneqarnikuunngillat.

Allatut oqaatigalugu atornerluineq pinngitsuuisinnaajunnaarsimanerlu inuiaqatigiinni ajornartorsiutaapput angisoorujussuit aamma ukiorpassuarni taamaassimavoq. Demokraatini neriuppugut manna inatsisissatut siunnersuut iluaqutaajumaartoq ajunnginnerusumut sangunissamat. Suleruluttariaqarpugulli aamma ammaffigisariaqarparput inunntut ataasiakkaanut suna pitsaanerpaanersoq.

Taamatut oqaaseqarluta siunnersuut Ilaqutariinnermut Peqqissutsimullu Ataatsimiititaliamut innersuupparput.